

Amanda Boots di St. Maartenstraat:

"E luga aki ta hopi bunita"



ORANJESTAD (AAN): San Nicolas y Oranjestad ta pasando den desaroyonan hopi importante e ultimo añanan. E dos ciudadnan aki a wordo negliisha pa hopi aña, specialmente durante di e gobierno anterior. E consecuencia di esaki ta cu tur dos e centronan aki a cay den un decadencia structural serio.

Na San a Nicolas cuminsa cu cambionan di

infraestructura den centro, pero tambe den barionan rond di San Nicolas. Ehempelnan di esaki ta barionan di De Vuyst y Juwana Morto cu a haya un renobacion grandi cu ta inclui iluminacion pa siguridad di e bisifanan di e barionan aki.

Sint Maartenstraat ta un caya hopi conoci, pero na e mesun momento uno hopi lubida. Esun cu pasa awor aki den St. Maartenstraat sigur no

por reconoce e caya. Esaki ta pa motibo cu e renobacion a transforma e caya totalmente. Awo tin caminda di cana pa e bisifanan, luga di parkeer y matanan cu ta ofrece e peaton un bista bunita, pero tambe sombra. Amanda Boots ta biba practicamente mei mei di St. Maartenstraat y ta hopi contento cu e desaroyonan. E ta bisa cu "e bario ta uno dushi pa biba aden, pero e ta



birando miho, e ta birando hopi bunita."

Segun Amanda, awor por cana un tiki mas trankilo. Antes autonan tabata core hopi duro y e caminda tabata di dos direccion. Tempo cu a cuminsa cu e proyecto di renobacion di St. Maartenstraat a papia cu e habitantenan pa asina por compronde y haya sa nan punto di bista relaciona cu e renobacion. Awo cu e proyecto ta practicamente cla, e bisifanan por wak contento na un proyecto cu a tene cuenta cu nan deseonan. Segun Amanda, "autonan no ta core duro mas, pa motibo cu a construi tambe 'verkeersplateau' riba e caminda." E ultimo aki e ta haya algo masha importante mes, no unicamente pa e hende grandi, pero specialmente pa e hobennan cu ta hunga pafu cu mas siguridad awo.

St. Maartenstraat por wordo considera e ehempel di con e otro cayanan di e bisindario ta bay bira. Esaki ta e prome fase di renobacion di e bario. Mas pabou di St. Maartenstraat por tuma nota tambe di e parke cu a wordo construi net dilanti di Hulpbestuurskantor di San Nicolas. Tambe a construi un rotonde cu ta bay facilita e fluho di trafico drelando y saliendo for di centro di San Nicolas.